

Digitized by the Internet Archive  
in 2018 with funding from  
Getty Research Institute



# FRANCISCI MARIANI

BIBLIOTHECÆ VAT. SCRIP. GRÆCI

PRO JO: ANNIO VITERBIENSI

SACRI PALATII MAGISTRO

## O R A T I O.



**S**iquis in hoc Senatu totius litterariæ Reipub., in qua doctissimus quisque etiam morte obita diutissime vivit, ante sapientissimos Judices tot, tantosque Viros in accusatorum subfelliis viderit, quot alias nusquam aut legimus, aut audivimus; multum profecto mirabitur, me unum potissimum in causa, ut multi putant deserta, ac relicta, sine ullis præsidii ingenii, eloquentiæ, auctoritatis surrexisse ad dicendum. Nemo enim unus est, qui ignoret, quot accusationibus, quot censuris, quot etiam testimoniis Annii constrictus teneatur: adeo ut, si Cicero ipse Oratorum Princeps hujus patrocinium susceperet, si omnes ingenii, atque artis nervos intenderet; tamen minime dubium sit, quia sicut in causa Milonis, qui ab Annia gente nostræ Etruriæ fuit adoptatus, armatorum hominum strepitu territus pæne animo concidit; sic in hoc Annii judicio tot accusatorum literis, atque linguis debilitatus, ac fractus causa esset casurus. Ego tamen, Judices, quum video tot amplissimos Viros contra hunc reum conspirantes, quod aliis metum, ac linguæ torporem incuteret, nescio quomodo mirifice recreor. Quod quo pacto eveniat, etsi difficile dictu videatur, tamen aperte, ac breviter explicabo. Scio per universam Europam & Ludovicum Vives, & Melchiorem Canum, & Philippum Cluverium, & Vincentium Borghinium, & Thomam Dempsterum, & Gerardum Vossium, aliosque Anniana Commenta exagitasse: scio Anonymum Mediolanensem, Augustinum Calmetum, Albertum Fabricium, & Genevenses Criticos contra Viterbienses antiquitates quædam scripsisse: Scio alios magnis propositis præmiis, alios malis artibus, & fictis epistulis ad meos libros, quos Annii fragmentis inniti putant, confutandos sollicitari: at mihi hoc ingen-



tes propemodum animos facit. Ergo tot post annos, post tot Adversarios eloquentissimos adhuc quaritur, allicitur, irritatur qui contra nos arma capiat? Vigent igitur Viterbiensium rationes, nostræque antiquitates neque senio, neque ulla iniuria, neque Criticorum iudiciis debilitatæ sunt. Quorum enim novum veluti bellum indici, & classicum cani oportuit, si nostra monumenta fracta, ut quidam jactabant, ac contrita fuissent? Quum Curtius Inghiramius libros illos Volaterranæ antiquitatis vulgasset, Leonis Allatii brevissimo scripto confutati, statim ex manibus omnium exciderunt. Omitto alia simillima. At nostra fragmenta longe alia fortuna usa sunt, ut videbimus: adhuc in utramque partem disputatur, innumerique spretis Aristarchorum importunis clamoribus Annii scripta sequuntur. Quare vos Judices, vos universæ literariæ Reip. Præsides oro, ut me dicentem attente audiat. Vetus hæc contra Annium criminatio est, ac multum, & sæpe quæsitæ; verum nunquam publico judicio agitata: tractata est potius apud arbitros veluti in umbra, atque otio, quam in hac luce, ac severitate Senatus: defensa est ab exteris hominibus, non à Viterbiensibus: unde ego juste, pieque defensor venio, ne quis silentium nostrum in conscientiam vertat. Non ego mei ingenii tenuitatem excuso, non adversariorum auctoritatem minuo: me neque doctrina, neque eloquentia, neque ulla alia in re parem prædico: ast ad hanc causam defendendam (quanquam multo difficilius sit defendere, quam accusare) tam instructus, animo sic erectus, adeo vestra sapientia, & æquitate securus accedo, ut potius cogitem quonam pacto adversariorum nomini, atque existimationi consulam, quam quomodo pro Annio dicere debeam. Ajo igitur ab illo nihil suppositum, nihil dolo malo confectum: Ajo tantum abesse ut finxerit, ut multa non intellexerit: Ajo multo plura quotidie reperiri certa, atque inconcussa, quæ ipse, ac reliqui Viterbienses penitus ignorarunt: unde intelligere quivis poterit Annium talia ferme, qualia ei fors obtulit, edidisse.

Annius, qui propter Joannis nomen proprium Italorum more Nannius quoque dictus est, anno quadringentesimo trigesimo secundo supra millesimum nobili genere natus est Viterbi Patrimonii S. Petri Metropoli. Is sacro Prædicatorum Ordini nomen dedit, assidueque studia summa cum pietate conjungens non modo singularem doctrinam, atque eruditionem, sed tantam apud Summos  
Ponti-



3

Pontifices, Cardinales, aliosque Viros existimationem est affec-  
tus, ut Sacri Palatii Magister ab Alexandro VI. renunciaretur.  
Dum Genuæ morabatur fragmenta Catonis, aliorumque nactus est  
à Guilelmo Mantuano multo ante decerpta, postea Berosi excerpta  
quadam dono sibi data a Georgio socio Provincialis PP. Dominica-  
norum Armeniæ, quæ omnia ipse adjectis commentariis vulgavit:  
Interea multa signa Etrusca, atque inscriptiones repertæ sunt in  
agro nostro Cybellario prope Tuscanellum, quod semper cum nostra  
Urbe de antiquitate certavit. Sic ipse in suis libris editis testatus est,  
dum illi quoque, qui harum rerum testes erant, vivebant. Nemo ta-  
men unus, quanquam tantam novitatem omnes admirabantur, nemo,  
inquam, de iis dubitavit, nemo scribere aliquid contra ausus est,  
quamvis ipse & oraret, & obtestaretur, ne suum interitum expecta-  
rent. Publicas præterea hisce de rebus disputationes haberi voluit  
in Palatio Senatus, Populique Viterbiensis, quum nostra Urbs do-  
ctissimorum Civium, & exterorum copia floreret, propter Alexan-  
drum VI., & Carolum Francorum Regem, & paullo ante Pium II.,  
& Fridericum Imperatorem, qui apud nos aliquandiu morati fue-  
rant. Aderant tunc Juvenes studiosissimi Fatius Sanctorius, &  
Ægydius Augustinianæ Familiæ decus, quorum uterque ad sacram  
Purpuram singularis doctrinæ commendatione evectus est. Aderat  
Thomas Veltrius græce, & latine doctissimus, qui cum Annio dispu-  
tavit, & postea Cathedram Castrensem obtinuit, quique teste eo-  
dem Ægydio Thucydidem elegantissime vertit. Aderat Alexander  
Farnesius, qui ex Archipresbytero Ecclesiæ Viterbiensis S. Sixti  
Cardinalis, nostræ Urbis, & totius Patrimonii Legatus, & demum  
Paulus III. fuit appellatus. Florebant tunc apud nos tum Jo: Bene-  
dictus Annius, tum Jo: Baptista Almadianus Romanæ Curiae Pro-  
ceres, quorum Carmina pæne Virgiliana in Corcyrianis leguntur:  
Præterea Augustinus ex eadem Almadianorum familia, Cerasius  
Medicus, & Poeta, Spiritus Protonotarius Apost., & Lælius Orator  
eximius, quorum laudes legi possunt in Epigrammatis Cantalcii,  
qui apud nos humaniores literas docuit, & Commentarium in Per-  
sium edidit. Florebat etiam Cæsar Malvicinus, qui obitum Platinæ  
versibus exornavit, cujus fuisse puto notas illas, quas Casaubonus  
in Svetonium suis admiscuit, Cornelius Benignus, & Joannes Gattus  
homines nobilissimi, atque eruditissimi, quorum meminit Pierius



Valerianus . Omitto Joannem Botontum postea Camera Apostolicæ Clericum, cujus litteras habemus inter Ægydii autographa: nihil dicam de aliis nostratibus, nihil de exteris, inter quos enumerare possem Lælium de Manfredis, cujus meditationes quædam apud Sandreanum Urbinatem extant in rem nostram MSS., & Franciscum de Albertinis, ut videmus in libro, quem scripsit de Romæ Antiquitatibus. Tot igitur, tantosque viros Annius fascinavit, decepit, in fraudem induxit? Alexandrum ipsum Pontificem, certe minime simplicem cum tota Curia suis artibus irretivit, suis præstigiis illudit? Ex his omnibus nemo unus eum fraudis, dolive insimulavit, nemo non modo infamia, sed ne suspicione quidem aspersit, aut de iis antiquitatibus dubitavit. Videbant ingentes statuas, multas inscriptiones, atque alia signa effossa, quæ omnia clam ab Annio facta, idque prope Tuscanellum, ad Summum Pontificem præsentem, totumque Orbem decipiendum insano solum in mentem venire potuisset. Fateor post Annii mortem ea ab iis, qui hæc non viderant, in dubium vocari cœpta esse. Dubitavit Volaterranus, dubitavit Sabellicus, dubitavit unus, & alter: Sed horum dubitatio infra suspensionem stetit: immo Volaterranus Desiderii Decretum, ut antiquissimum compluries laudat, & sequitur, quod & fecerat Politianus in Epistula ad Petrum Medicem, antequam Annius suos libros divulgaret. Animosiores aliquanto Crinitus, & Vives, pleraque omnia illam confinxisse scripserunt, sed nullum signum, nullam afferunt conjecturam. Flagito igitur testes. Latinum Latinium Viterbientem proferunt, qui Osiridis lapidem supposuisse ait. Oro vos, Judices, ut testimonium, quo Accusatores ne voto quidem fingere gravius poterant, diligenter attendatis, ex hoc enim totam causam pendere merito dixerim. Ajo igitur primum Latinium in hoc judicio testem esse non posse: is tunc longe gentium aberat, & gravissimo sopore oppressus ad nostra litora nondum pervenerat. Adeo ne igitur parum tantæ auctoritatem Senatus verentur adversarii, ut absentem, & dormientem testem adhibeant? Sed omittamus verborum ambages. Latinus testis esse non potest, quia his rebus non modo non interfuit, sed aliquot annis post Annii mortem natus est. An is vidit, quum vivere nondum incepisset, quæ tot homines præsentibus oculatissimi penitus ignorarunt? Deinde quoniam Accusatores in hoc testimonio nituntur maxime, fereque omnes, qui contra nostras antiqui-



tiquitates scribunt Cluverius, Bayle, Vossius, Fabricius, alique illius verba referunt, repetuntque *invento ut populus clamabat Osiri*, placet illud audire ex Antonio Augustino, nam Latinus hac de re nihil scriptum reliquit. **TESTIMONIUM AUGUSTINI.** Quæri heic posset, & deberet unde hæc hauserit, à quo didicerit Latinus, & quare de aliis inscriptionibus, signis, ac libris nihil dixerit, nihil reprehenderit. Sex tabulas refert Annii: in sexta dumtaxat de Osiride, & Coniuge differit, quam ideo vocat Osirianam. Sed sat erit si solum testimonium hoc expendamus: *Mibi Latinus Latinus Viterbiensis Vir doctus, bonæque fidei de Jo: Annio Viterbiensi Monacho jucunde narrare solebat insculpendas lapidi curasse litteras, quem vineæ infodi jusserat non procul à Viterbio.* Male auspicatur Latinus, & in ipso limine offendit. Lapidem hunc, Judices, in omnium conspectu ab antiquo, quod optime notat etiam Thomas Mazza, non dicam nostræ historiæ, sed ipsius Annii Commentaria extitisse testantur: *Majores nostri, scribit, posuerunt in templo Herculis nunc D. Laurentii, ut semper ante oculos nostros æterna vetustatis hujus Urbis memoria teneretur.* An is adeo bardus erat, & stultus, quem tamen ipsi accusatores & doctum, & callidum fuisse clamitant, ut illum se primum reperisse fingeret, quem ipse ante oculos omnium majorum semper in Templo D. Laurentii extitisse disertis verbis asseruit? Sed perge porro. *Terra effossa antiquitatem, & literas à se confictas admiratur.* Quam vereor ne cecitas suæ senectutis, quam in Epistulis, & Carminibus Latinus deplorat, ab infantia inceperit! In eo, Judices, ne una quidem litera est. Arbor est cum ramis undique sparsis, quam vitis circumplectitur: Sunt quædam volucres, quas accipitres dicit Pierius Valerianus: in imo trunco videtur esse crocodilus, quem Annii non observavit: supra hinc atque inde duo capita Osiridis, atque Isidis. Annii hæc solum interpretatus est: recte, secusne alii viderint. Audiamus reliqua. *Contineri Viterbi Urbis originem ab Iside, atque Osiride condita.* I nunc Augustine, & bonæ fidei Latinus appella: Enimvero optima, atque egregia fides est, quæ credit, & non videt. Hæc nunquam scripsit, nunquam somniavit Annii, nec in mentem ei venire poterant, qui Fanum Volturnæ cum Vetulonia Osiri antiquius intra moenia esse sciret, scriberet, atque argumentis etiam probaret. Extant illius libri, in manibus omnium est illius lapidis, aliorum-



rumque explicatio . Annii commentaria & Parisiis , & Antuerpiæ , & Basileæ , & Venetiis , & Romæ edita sunt . Quam vellem verba hæc ex ore Latinii nunquam excidissent ! Nam quum Annium ab omni mendacii suspicione libero, alterum Viterbiensem, quem multis nominibus & colo , & veneror , stultitiæ summæ , ne quid gravius dicam , invitus accusare cogor . Verum quoties hæc ego mecum tacita consideratione perpendo , vix possum adduci , ut credam hæc Latinium cogitasse , ne dum dixisse cum propter L. Spurinnæ votum HERCULI DEO , quod ipse ex antiquo lapide descripsit prope illius Fanum repertum , tum propter Desiderii Decretum , quod nullo obelo , nullaque censura notavit a. d. IX. Kal. Augusti , quum minima quæque lynceis oculis, ut ait Baronius, in notis ad Martyrologium correxerit , atque expunxerit . Heic criticum agere , heic lynceos illos oculos adhibere , heic suis amicis imposturas ostendere debebat , si fidem Annio detrahare volebat : quando lapidem hunc celeberrimum , testimonium hoc tantæ antiquitatis , characteribus indubitabilibus expressum, cui aliæ Urbes Italiæ simile non habent, ut nostris Civibus affirmavit Sigonius , non notat , non rejicit , non confutat Latinus , quis credat Osiridis Hieroglyphicum , obscurasque notas ægyptias ei negotium faceßere potuisse ? Jure igitur possum negare hæc Latinium dixisse : non quod illius testimonium aliquid ponderis habeat , sed ne excusatione summæ stultitiæ ab eo summum improbitatis odium cogar deprecari . Fieri non potest , ut vir doctus , bonæque fidei , ut vocat Augustinus , ea testificatus sit , quæ non vidit , ea asseruerit , quæ sibi contradicunt , quæque manifestissime falsaprehenduntur . Hoc tamen est , in quo exultant adversarii , in quo totius accusationis robur , & firmamentum inesse existimant : hæc est arx illa , in qua tot tela contra Viterbienses vel conflagrant hostes , vel exacerant : hæc illa nubes teterrima , ex qua tot bruta fulmina contra nos emissa sunt : Atque hinc intelligi potest , utrum Viterbienses , an adversarii impostores sint , fabulise delectentur . Reliquæ accusationes , Judices , in duas classes dispertuntur . Alii ex Latini , seu potius Augustini fabella ad alia gradum facientes libros quoque , atque alias antiquas tabulas ex integro confinxisse Annium clamant : alii contra Catonis fragmenta , cum reliquis vera esse , sed ab illo fuisse corrupta , ac vitiata . Jam si qui me arrogantem , atque audacem censent , quod contra tot doctis-



Atissimos homines hanc causam publice defendendam susceperim;  
 mitiorem mentem, opinor, induent: quod enim patrocinium facilius,  
 ac commodius excogitari potest, quam illud, in quo ipsi accusato-  
 res, vel pravaricatoris partes agunt, vel defendendi copiam, ma-  
 teriamque suppeditant? Omnia flagitiosissime finxit, & supposuit  
 Annii, cum Cano, Cluverio, Fabricio, aliisque primi accusatores  
 exclamant: Minime gentium, respondent alii cum Reinesio, & Mi-  
 cralio: sunt multa verissima, & antiquitatis non contemnenda  
 de Catonis excerptis, ait Panvinus: *Quodenim prodigium fuerit,*  
 addit Gaspar Barthius, *Monachum illum minime tam profunde do-*  
*ctum talia comminisci potuisse?* Desideriani Decreti characteres  
 sunt vere langobardici, subdit Holstenius contra Cluverium, &  
 trecentis annis ante Annium visum, & descriptum reperitur: sub-  
 scribuntque Holstenio Raphael Fabrettus, Gruteri nova Editio, &  
 Scholia in Dempsterum. Nihil dicam de Simlero, Sylvio Ambianensi,  
 ac reliquis. Alii igitur nostras Antiquitates omnino reiiciunt, alii  
 ut genuina defendunt, sed quædam interpolata solum credunt.  
 Notum est quid de ijs sentiat Hankius, atque Aufonius Popma: quid  
 Fridericus Sylburgius, Leander Albertus, Guilhelmus Postellus,  
 Conradus Gesnerus, Sixtus Senensis, Franciscus Sansovinus,  
 Ægydius Cardinalis, Harduinus, & de la Cerda, qui Annii frag-  
 menta probant, & defendunt. Dionysii Gothofredi tam grave, &  
 exploratum testimonium pro ijs extat, ut multi eum desipuisse cre-  
 dant: Unus Sigonius, qui non modo sicut Manutius, Fleetwood, &  
 Calvinii Lexicon, aliique, Desiderii Decretum integrum refert, &  
 sequitur, sed præterea ait, *se tantam tribuere auctoritatem Catonis*  
*Epitomis, quantam incorruptis veteribus monumentis,* testis esse pos-  
 set locupletissimus. Sed hæc non urgeo. Satis est mihi, Judi-  
 ces, si inter se variantes, atque etiam dissidentes accusatores  
 ostendam; si qui ab Annio per summam fraudem, atque impuden-  
 tiam ea conficta asserunt, ij ab aliis Annii delatoribus oppugnentur:  
 quanquam sint etiam nonnulli, qui versutiores rota figulari, ut Rai-  
 naudus, & Ortelius, modo accusent illum, modo innocentem fa-  
 teantur; modo illius libros laudent, modo diris devoveant. Ex  
 accusatorum igitur delationibus, quid sentiendum sit non liquet,  
 multoque verior, ac constantior est eorum assertio, qui nihil ab  
 ipso confictum esse arbitrantur. Quod ut melius ab omnibus intel-  
 liga-



ligatur, adversarios oro, atque obsecro, quos ab Augustini narratiuncula deceptos scio, ut rem totam ad trutinam iterum revocent, considerentque depositis omnibus præjudiciis illum non modo a quibus, & ubi ea fragmenta acceperit litteris mandasse; sed tres præterea testes adesse Leandrum Albertum Bononiensem, Aloysium Seraphinum a Foro Cassio, & Franciscum Salictum Faventinum, qui una voce in suis libris affirmant a se, & ab aliis ea M. ss. antiquissima esse visa. Possum etiam testem appellare Jacobum Villot, qui in Armenia diu Sacris Soc. Je. Missionibus præfuit, quique testatus est multa se ibi de Viterbi antiquitatibus ex vetustis monumentis legisse, quod mirum in modum ei consonat, quod noster Antiquarius ducentis annis ante scripserat, nempe Berosi excerpta a socio Provincialis Armeniæ se dono accepisse. Verum quid multis opus est? Decretum Desiderii ante natum Annium descriptum extat. Hæc omnia tam perspicua, tam certa, tam constantia sunt, ut vel sola illum ab omni non modo culpa, verum etiam a suspitione liberent. Quare intelligere satis non possum, quonam modo quidam ceteroquin homines religiosissimi nullis conscientiæ terroribus pertententur, dum in suis scriptis, atque sermonibus per summam injuriam, nullo firmo, immo ne probabili quidem argumento, solum ob inanem rumorem, atque ob levissimas conjecturas ab æquitate, a justitia, ab humanitate discedant, virumque moribus, doctrina, ac dignitate præstantem, re nondum satis comperta, tot doctis viris, tot probationibus, immo divini, humanique juris legibus reclamantibus, falsarium, planum, tenebrionem omnium imperitissimum appellent. O sanctas gentes, o homines veritatis vindices, & justitiæ cultores! At satis, superque, inquit, probarunt Melchior Canus, Philippus Cluverius, Vincentius Borghinius, Magnus Hesantalerus, Gaspar Varrerius, Gerardus Vossius, Franciscus Sparaverius, & Jo: Albertus Fabricius, qui ea fragmenta plurimis erroribus scatere demonstrant. Quāquam, Judices, Thomas Mazza, Franciscus Macedo, aliique multis ex ijs argumentis, quæ opponuntur, pro virili parte responderint; ego tamen, qui Annianorum fragmentorum auctoritate neque egeo, neque unquam usus sum (excipio Desiderii Decretum), si multa falsa in ijs esse concedi postulant, non gravate concedam. Quid tum igitur? Ergo, inquit, ab Annio veteratore sunt conficta. O



conclusionem nostris accusatoribus indignam ! Ex hoc neque sequitur esse supposita ( quot enim ejusmodi in Herodoto v. g. , ut notat Cicero , & Josephus , quot in aliis græcis , & latinis scriptoribus ? ) Videte quot parasangis absint a concludendo Annium fuisse commentum . Senferunt & alii quam ineptum sit hoc differendi genus , quare post longas dissertationes contra nostras antiquitates , quàm a Reinesio quædam afferrentur paullo ante inventa , & toti litterariæ Reip: ad id tempus ignota , quæ tamen in nostris monumentis legabantur ; vel ab Annio , vel ab alio conficta esse dixerunt . At Fabricius ut labantem jam suam accusationem tibicine fulciret , *nihil impedimento esse* , respondit , *quo minus ex iisdem auctoribus , ex quibus antiqua illa fragmenta esse Reinesius ostendere conatur , eadem Annius ingeniose confinxerit* . Quid ais Clarissime Fabrici ? Nihil impedimento est ? Ex Auctoribus ? Non sentis te ab accusatione ad divinationem transire ? Non vides quanto ego potiori jure ex tuis verbis colligere possim : si ex auctoribus , ergo non confinxit ? Sed hæc levis armaturæ . Aliud restat prælium , alia monstra , ut ipse ais . Agedic mihi , quid argumenti affers , quamobrem ille , & non alius ea supposuerit , quando conficta esse vis , atque inter portenta recenset ? *Quod Annius* ( sunt verba Jo: Alb. Fabricii ) *potius ipse , quam alius ante eum fraudis tantæ architectus a plerisque habeatur , mirum non est , cum aliunde constet de ingenio ejus composito ad literarias hujusmodi imposturas excogitandas , credulisque obtrudendas* . Me miserum ! Jam montes moventur : jam Osiris , atque Isis non contra Gigantes , ut scribit Annius , sed cum ipsis terrigenis contra Viterbientium portenta prorumpunt . At unde constat , Eruditissime Fabrici , tantæ fraudis fuisse Architectum ? *Decantatissimum est* , inquit , *quod ex Latini fide retulit vir Clarissimus Antonius Augustinus* . Latini fidem profers ? Parturiunt montes ! Credebam proditurum Herculem aliquem contra monstra illa Anniana , at neque Achilles est , sed Patroclus , quem ajunt *falsis cecidisse sub armis* . Ast , inquiunt , ab alio saltem supposita sunt ante Annium . Audio . Hæc est alia pars divisionis accusatoriæ , quam posuerunt nonnulli , quæ quidem Annium absolvere , sed Viterbienses oblique accusare videtur . Verum laceſſo singulos adversarios , in concionem voco : *Accusatio* , inquit Tullius pro Coelio , *crimen desiderat , rem ut definiat , hominem ut notet , argumento probet , teste confirmet* . Ego hæc argumen-



ta, atque hos testes, non modo sine ullo timore, sed etiam cum aliqua spe delectationis expecto. Quis enim ante nostrum Antiquarium in ea temporum, ac litterarum barbarie ea comminisci, quis decretum illud Desiderii, quis characteres illos imitari potuisset? Sed hæc vetera. Tegulas Sepulcrales Volturrenæ figlinæ super Ethnica cadavera nuper inventa, superque pavementum de Musivo in Fano Volturnæ, quod exhibet Montfaucon in Supplemento de Templicis, Viterbieneses ne machinati sunt cum innumeris Statuis, & characteribus Etruscis, aliisque signis, quæ quotidie in toto nostro agro reperiuntur, quorum pars æneis tabulis expressa a P. Feliciano Bufio quam primum edentur, & explicabuntur? Hæc ignorarunt Annii Adversarii, sed suspiciamus in Coelum, & gratias maximas Superis agamus, nam si vidissent, non impostorem, non falsarium, non mendacem illum appellassent, sed magici sceleris, tartareæque coitionis Sac. Palatii Magistrum arcessissent. Verum ad longinquiora veniamus, quo neque Annii, neque aliorum Viterbientium fraudes aspirare potuerunt. Sabinam opidum prope Ravennam ponit ejusdem Urbis Anonymus. Hæc Urbs, ut ait Scholiastes Porcheron, *a ceteris omnibus filetur*. At non silent nostra fragmenta: Cellarius profert litteratum lapidem ibidem inventum, ut Viterbieneses fabulas veras esse testetur. Genuam a Genio Iani habere nomen, & *Carin Janum* hebraice *Vineam Jani* significare asserit noster Antiquarius. Omnes heic ringuntur, præsertim quum Antiqui scriptores hoc sileant, immo de Genuæ, seu ut quidam vocant, Ianuæ origine vehementer dubitent: At Ianus locus prope Genuensis agri fines legitur apud eundem Ravennatem, & sæculo elapso in Carin-Jano, quæ pars ejus Urbis est, statuam antiquissimam inventam esse cum gemina facie, sceptrum cum clavibus tenentem certum est, atque adhuc visitur in parte Ecclesiæ Majoris S. Laurentii, & licet saxeæ Annianæ voci respondet. In Catonis Epitome legimus: *Interiit Saga Opidum Etruscorum*, illudque ad Padum collocatur. Sacis Opidum ibi extitisse ex Peutingeri tabula notat Cellarius, laudatque merito nostrum Catonem. An Viterbieneses tabulam illam viderant, quam primus Velsærus in lucem protulit? Sic Cluverius perfractæ negat ad Lacum Larium, qui a nostris Ludius quoque dictus est, extitisse Volturrenam: à Telle Opido Vallem-Tellinam, non Volturrenam plerique dictam volunt. Scire vultis qua de causa? Quia nimium fidei,



fidei , atque auctoritatis nostris monumentis accederet . At in iis locis Uulturinam , seu, ut M. ss. codices habent, Volturniam recenset non modo Paulus Diaconus, quem caussari possent a nostris fuisse lectum, sed uterque Iovius homines doctissimi, atque in ea regione nati ex antiquo nomine, & ruderibus adhuc extantibus. Togum, seu Tog-Orma in Celtiberis fuisse scribit Berosus Annianus: & Togum in Hispania fuisse cultum inscriptio vetustissima indicat, quam protulit Mariana, quamque refert Reinesius, laudatque merito nostra fragmenta, in quibus *genuina profundæ antiquitatis ab adsummentis Annianis secernenda esse* ait. Prætereo Tubal, qui ibidem regnavit secundum Berosum, & Tarraconem, quam Tyrrhenicam appellat Aufonius, hebraici nominis dicit Bochartus, atque ab Enacim conditam Ben-Iamin Tudelenfis, quem primus ex hebræo vertit Arias Montanus. Quid dicam de Forano, seu Foro Annii, ut noster Antiquarius explicavit? Quis non juret hoc ab eo confictum ad suum nomen illustrandum? At lapides Viæ Annix postea detecti apud Panvinium accusatorum ora comprimunt, & contundunt. Quid dicam de Coloniis in Gallias a nostris missis? Hinc videant quantæ Antiquitatis sit noster Berosus: ostendi enim ibi fuisse Viterbi nomen, Urbem Aturam, Montem Cemenum, Caput Voltumnæ, Agrum Tursanum, & Lartem Aremorium, quæ omnia Annio, ceterisque latuerunt. Iam videtis, Iudices, me data opera nullum verbum facere de ijs, quæ cum priscis, notisque scriptoribus conveniunt: nam ea potuisse nostros ab ijs mutuari dici posset: illa tantum attingo, quæ verissima sunt, sed ad Annii ætatem cunctis erant ignota. Quis unquam cogitavit Etruscos ab antiquo, primaque ab origine dialecto hebraica locutos? Et tamen innumeræ voces primæ lingue, quas enumeravi in libro præsertim italico, easdem & sono, & significatione cum Tuscis esse demonstravi, & complura vocabula Sabinorum veterum, quæ cum Ætyopicis conveniunt, quod & alii adnotarunt, hæc verissima esse confirmant. Ex quo quam verax sit noster Antiquarius cognoscitur: quum primus enim linguam Etruscam ex Hebraeis, & Chaldæis derivet, suffragatores postea habuit Scaligerum, Vossium, Merulam, Tomassinum, ipsumque Antonium Augustinum, & cum aliis etiam Samuelem Bochartum, qui quamvis multum a cognata Phœnicum dialecto suæ inserviens causæ habere velit; tamen Saturnum esse Noe non semel



fatetur, eumque linguam hebræam retinuisse, & Cethim, Latium, Saturniam ab eadem fluere, atque idem significare pronuntiat. Multa addere possem de Iano, seu primo Saturno falforum Deorum antiquissimo, & Cui *par nullum Græcia numen habet*, quique a nostris, & ab Ægyptiis cultus est; multa de Oenotro, & de Arcadia, Babylonica; multa de Enyaliio Sabinorum, Spartiatarum, & Chaldæorum Deo; de Cure, Cam-Ese, & Semo, aliisque, quæ vel levissime attigit Annius, vel prorsus ignoravit cum suo Beroso. Epigramma SEMO DEO SANCO in Sabinis apud Gruterum, nemo melius quam ipse explicasset, si vidisset: ut nemo verius exposuit illud Silii a *Bactris nomina ducens Casperula*, quod probat Holstenius, quamvis Cluverius irrideat. Quam latus sese aperiret dicendi campus, si amplificare liberet Vossium illum acerrimum nostrum adversarium, cum aliis bene multis tandem manus victas Annio dedisse, dum licet invitus coactus est fateri compluries Ianum vere esse Noe, atque ipsius etymo hebraico etiam subscribere? Hoc tamen unum præterire non possum: Atus, qui colonias in Turrheniam misit secundum Herodotum, aliosque complures, nonne Assur est Ludi frater juxta variam linguarum dialectum, sicut *Verse* lingua Etrusca, *Vesta* a Latinis, *Esa* a Caldæis dicebatur? Nonne Ludi, seu Lydi dicuntur Etrusci teste D. Hieronymo, quæ vox penitus hebraica est, & ideo Mæones ab Homero, aliisque illam interpretantibus appellantur, ut notat Bochartus? Hæc expendere debebant adversarii, antequam carperent nostras Antiquitates, non sententiam ferre indicta causa, non damnare Viterbieneses sutorio atramento. Verum quorsum ego contra hos homines præposteris clamem? Quorum aliqui eo temeritatis prorumpunt, ut dum Annium criminosisime insectantur, & condemnant, nunquam illius libros se legisse gloriati sint, idque in editis voluminibus cum jactantia, atque ostentatione tanquam subacti ingenii, emunctæ naris, atque artis criticæ eximium argumentum testificari non erubuerint: alii monumentorum nostrorum præsertim musivi Operis evidentia convicti, quum nihil quod opponerent, possent reperire, tamen se nolle nostris Antiquitatibus assentiri, hoc solo prætextu, quod Annius fabulator sit, pervicacissime responderunt. Sed hæc Capita Anticyris digna relinquamus: restat enim, ut secundæ accusatorum classi respondeam, qui non adeo hebetes, atque humi strati, sed rei veritate,



ac perspicuitate erecti viderunt non potuisse ea fragmenta Viterbientes comminisci: viderunt quotidie nova velut agmina probationum ex terra, & faxis prodeuntia, quare multo remissius, quam verius loqui didicerunt: Annium scilicet vera excerpta habuisse, sed quædam proprio Marte inferuisse, atque adiecisse de suo. Heic Iudices, maxime auctoritate vestra mihi opus esse video: ex latissimo accusationum campo in arctum hunc locum tandem conclusi Accusatores jam neque dilabi possunt, neque tergiversari. Vel singillatim quæ ab Annio sunt adiecta demonstrent, vel illum omnino innocentem fateantur. Hanc æquissimam conditionem repudiare minime possunt: interest magni literariæ Reip. vera a falsis secerni. Indicent igitur quid adiecerit. Ea immiscuit, respondet Dempsterus cum suis scholiastis, alique, *quæ ad Patriæ decus promovendum* facere posse putabat. Etruriam Metropolim, ubi Viterbum est, excogitavit, additque Tusciam, ac Turrheniam dictam, quam irrident omnes cum Vincentio Borghinio, atque Anonymo Mediolanensi, quam nec Cluverius, nec Dempsterus, nec Cellarius noverunt. Non repetam nunc, Iudices *τὴν ἑρρηνίαν πόλιν* Etruriam Civitatem ex Stephano, qui ex professo de Urbibus scripsit: non referam Plinii atque Hellanici testimonium ex Dionysio, quem Latini interpretes non satis intellexerunt: solum ab adversariis quæro, an Tuscia Urbs extiterit? Negant? Lapis antiquus paucis ab hinc annis Viterbi repertus sic habet: L. VALERIO L. F. PAL. TVLLO TVSCIANO &c. Non ignorant, opinor, Patriam post tribum, & cognomen in Inscriptionibus poni, quod diserte tradunt Fabrettus, & Ursatus Lapidariæ artis peritissimi. Addere possum *Vitalianum Episcopum Ecclesiæ Tuscæ* cum Clusino, Sutрино, aliisque Episcopis nostræ Provinciæ ex M.ss. Vaticanis, aliisque editis VI. Synodi sub Agathone, & Vittonem *Tuscanorum Comitem* ex Fuldensium Annalibus. At hinc, respondent Tusciæ nomen, non Etruriæ elicitur. Egregie. Verum indicent, quis Geographorum veterum Tusciam Civitatem nominaverit? Herent, Iudices, neque se unquam expedient. Eant jam ad Ortelium, Cluverium, Dempsterum, Cellarium, & Carolum a S. Paulo, moneantque familiariter, ut in suis libris hoc quoque nomen recensere non dedignentur, quæ Tursenia a Græcis, seu Tuscania dicta est, a nostris quoque Etruria. At Etruriæ Civitatis nomen apud Antiquos



non legitur . Iam de more ad vocum aucupia confugiunt . Ego sexcenta protuli testimonia ex Plinio , Livio , Tullio , Varrone , & Marciano Poeta , præsertim ex lapidibus Capitolinis , qui triumphum referunt ex ETRVSCEIS , & anno insequenti ex Uvlsiniensibus , & Uvlsientibus post Annium repertis . Nunc repetam solum ex Floro probationum potentissimam , ut ait Quintilianus *χαρμυκὴν ἀπὸ δ' ἔξιν* Is cum Livio Q. Fabium Max. ex Sutrino agro Ciminum subire meditantem describens : *Erat terror ingens* , ait , *a latere ETRURJA infesta ... in medio Ciminus saltus* . Locus hic adversarios , præsertim larvatum Insubrem getico stilo exultantem , adeo compressit , ut neque novarum editionum præsidio , neque ope recentium commentariorum , neque ulla ingenii , artisque industria effugere potuerint . Ostendi enim sic in omnibus M. ss. codicibus legi : ostendi Ciminum situm inter Agrum Sutrinum , & nostram Urbem , ostendi illud *in medio* sine gemino latere intelligi non posse . Vt verum fatear poterant adversarii ab his se nullo negotio expedire : poterant de more vociferari ab illo impostore nequissimo vitiatas fuisse tabulas Capitolinas , & Stephanum , & Florum fuisse corruptos cum actis Concilii Constantinopolitani , & Fuldensium Annalibus . Eja agite ad notas artes , ad ingenium redite : Clamate vocem maxima hæc Viterbieneses supposuisse , atque in bicipiti somniasse Parnasso : addite illa vestræ eloquentiæ flumina , illa vestri ingenii lumina , convicia , & maledicta . Interea dum vos ad ravim vociferamini ego **בֵּית תֵּרְבֹן** *Bet-Terbon* nomen Etruscum antiquissimum unius ex quatuor Opidis , & multo ante Desiderium Regem usurpatum , ut vere Ill: Fontaninus , atque Eruditis . Valesius , quos honoris causa nomino , ex Anonymo Ravennate , nostrisque historiis mihi objecerunt ( quod tamen ille Rex Viterbum dici iussit ) ex hebraica lingua Turrheni Torebi , seu *Terbi Domum* , idest Turrheniam significare ostendo , quod Annio nostro fuit incognitum . Ego Aturiam , seu Etruriam ab Atur Ludi , seu Lydi fratre , & Torebi Parente , a quo etiam Lydi dicti fuimus , apertissimo Sacrorum Bibliorum testimonio , & D. Hieronymi adnotatione deduco , eandemque cum Turrhenia , Tuscia , & Tursania radicem habere demonstro . Ego Cethim apud Isaiam , Ezechielem , & Numerorum Auctorem , quo Colonias Assur , seu Atur misit , Italiam esse ex vulgata Versione , & ex Onkelos , aliisque Hebræorum interpretationibus , quas

necef-



necessariis argumentis defendit Bochartus, atque ex etymologia ex  
 eodem paullo ante allata confirmo. Vnde argutatio Genevensium,  
 contra meum librum de Etruria Metropoli, quam imbecilla sit facili-  
 me convincitur, qui Cethim ad Græciæ regiones tantum accommo-  
 dant: quasi vero hoc ipse Annii, & Bochartus non præverterint,  
 aut valde operosum sit intelligere, licet Cethim de Cypro, aut  
 Macedonia dicatur, sæpe duas, aut plures terras eodem nomine,  
 fuisse appellatas. Hesperia nonne Italia, atque Hispania dictæ  
 sunt? Nonne Itala tellus, ut ait Ovidius, Græciæ nomen habuit?  
 Nonne Siculi prope Romam, ad Montem Ætnam, & in Pelopon-  
 neso fuerunt? Quod aliis exemplis confirmare possem, nisi doctis  
 notissima reseffet. At quatuor opida simul commentus est Annii.  
 O factum male! Verum scimus Mantuam Tusco de sanguine popu-  
 los habuisse quaternos, aliasque Tetrapoles similiter, ut de Syra-  
 culis notat Cicero: Quid quod Dionysius Hal: Oenotrum, quem  
 ego Janum esse ostendi ex Arcadia (Babylonica, non Græca) pro-  
 fectum Vrbes parvas, & contiguas condidisse apud nos testis est?  
 Hac de re habemus Viterbiense Statutum, ut vocant, vetusta Instru-  
 menta, & Godefridi Carmina M.ss. multo ante Annium. Epigramma  
 inventum est centum annis post illius mortem QUATERNO POPULO  
 ETRUSCO, quod Cluverius descriptum se accepisse testatur a Cardi-  
 nali nostro Gubellutio. Clament jam adversarii inflatis buccis a no-  
 stris fuisse confictum. Sed quorsum hæc, si jam Annii ætate similli-  
 mum habebamus? Vtrumque suppositum est, inquit: Vbi, a  
 quo, quando? Aut singula hæc evincite, aut vos, qui nos falsi  
 accusatis, vos calumniæ, atque imposturæ crimine convinco. Pes  
 medius litteræ E, respondet Reinesius, impar est aliis duobus.  
 Hæccine Remniæ legis obliti nobis opponunt? Quam invideo He-  
 raclito, qui nunquam ridebat! Sed his omiſſis alia expendamus.  
 Fanum Volturnæ apud nos jam omnes fatentur: Cæcinam fuisse  
 Volturrenum, non Volaterranum ex ipsa Ciceronis oratione, & re-  
 ditionem Cornelii Scipionis ex Faliscis ad Volturnam, non ad Vo-  
 laterras, ex Livii narratione apertissime demonstravi. Sed Voltur-  
 renæ figlinæ Annii Gentis, quas ex tegula Sepulchrali supra commemo-  
 ravi, omne suffugium morosis eripiunt. Vetuloniam, cujus no-  
 men in parte nostræ Urbis adhuc extat, quod observavit etiam Her-  
 molaus Barbarus, & Epitaphium Marci Cardinalis apud Ciacconium



ante natum Annium confectum, sed ab ipso non relatum, apud nos fuisse, & esse argumento sunt. Vt fileam de Arretinis, & Tiburtinis, quibus antiquissimum foedus cum Vetulonienfibus intercedit, qui publicis legationibus ad nos, & monumentis vetustissimis idem confirmarunt; dicam solum Cluverium, ubi animal Arcadicum appellat Annium, nimiam non recipiendi nobis, sed ridendi facultatem dedisse; Vetulonium enim, & Vetulonienfes aquas calidas contra Plinium, Ptolemaeum, & Silium in maritimis quodammodo per potestatem ponit, & corruptas omnes tabulas praesertim Peutingerianam censorio supercilio pronunciat: at Geographus Ravennas pariter non Vetulonienfes, sed Populonienfes thermas illas appellat, quare Porcheronius imperare animo suo nequivit, quin contra Cluverium scriberet: *Tabulae Peutingerianae sinceritas hoc loco asseritur*: addere poterat, & Annii fides ab improbissimo convicio vindicatur. Nihil de Longula dicam, quam ex Livio Viterbi esse concedit Volaterranus, Ferrarius, Jannottusa Tuscanello, atque Anonymus Mediolanensis, quamque Surrenam, novam idest Turrhenam appellatam scimus ex inscriptione L. Valerii, quam Annius non vidit, & tamen Surrenam dictam fuisse notat. Nihil dicam de Arbea, aut de Lucero ipsius Rege, nam nimius sum, si singula persequar. Quid igitur finxit Annius, aut alius ex Viterbienfibus, si non modo eadem, sed multo etiam plura ex indubitatis monumentis, quibus ipse caruit, asserta videmus? Is certe de Arbea, seu Arbani voce notat solum dictam sicut *Cariath-Arbe* idest *Civitas quatuor*: Barbare quidem, & parce. Quid si observasset **בית הרבה** *Beth-Arbe Domum Magnam* significare? Quid si apud Virgilium amnem Tuscum considerasset cum Aenea, quem ad petenda auxilia ab Etruscis mittebat, loquentem: *Heic mihi MAGNA DOMUS*, quam Metropolim fuisse canit? Quid si Servium interpretantem legisset: *Magnam Domum Caput Urbibus de Tuscia intelligi*? Verum is, quia Anonymum Ravennatem non viderat *Bet-Terbi* Etruscum nomen, & multo verius etymon plane ignoravit. Ille de Episcopi Cathedra nihil attigit, quam ego multo ante annum millesimum ex Summorum Pontificum litteris, ex Leone Sapiente, ex Sacrorum Conciliorum subscriptionibus antiquissimam, & multo ante Celestinum III. cum Ferentina, Blerana, Foroclodienfi, Graviscana, Tarquinienfi, & Centumcellensi conjunctam patefeci. Ille nihil de Co-

mitibus, aut Comitatu sub Langobardis scripsit, quem ego ex Leonis IV. Epistola, aliisque monumentis præsertim Archivi Farsensis, a Polimartio, atque Horta ad agrum Sutrinum, Minionem amnem, Montem Gosbertum, & Portum Maris, qui Corneti nunc dicitur, post Tarquinienſis Urbis interitum pertinuisse ostendi; & ex alia parte usque ad lacum Martis, & Territorium Urbevetanum, seu melius Orbitense, (ut videmus in vita Leonis III., & in Concilio Ro: sub Benedicto IX., quamvis illudat Anonymus Mediolanensis) quæ mirum in modum Desiderii Decretum confirmant. Ille Tuscanellum fuisse nostram Coloniam nec per transennam vidit (licet Desiderius a Viterbiensibus restaurari jubeat), quod ego ex Ufuardo probavi, ex usu eorum temporum, & ex nostri Comitatus finibus post Tarquinias occupatas, & deletas. Ille nihil differuit de antiquo regimine, in quam rem ego Prætores in medium attuli ex vetustis inscriptionibus, ex Scribonio Largo, & Marcello Empyrico, atque ex historia SS. Martyrum Valentini, atque Hilarii, Demetrii, atque Eudoxiæ, quæ in Bibliotheca Vallicellana vetere charactere descripta asservatur. Ille nihil de Civitate Romana, qua donata nostra Etruria fuit post egregium illud facinus adolescentis Spurrinæ, cujus gentilis Q. Quintianus Vetulonienſis dicitur in Inscriptione apud Gruterum, in quo diligentiam Lipsiensium Censorum requiro, qui me non intellexisse Val. Maximum credunt, quum ij neque Valerium, neque mea scripta perceperint. Quare si quæ ad Patriæ antiquitatem, & laudem pertinent tot monumentorum adminiculo, quorum Annius expers fuit, majora multo, ac certiora non ad opinionem, sed ad veritatem probavimus, quis dubitet de illius fide, aut litem intendat de Sempronio, Archilocho, Philone, & reliquis, qui de Urbe nostra, & de rebus nostris Etruscis aut parum, aut nihil differuerunt? Adeo ne stultus, aut ineptus censendus est, ut cum tot testimoniis verissimis abundaremus, fictis a se auctoribus fidem suam vellet committere præsertim in rebus maxime alienis, & minime necessariis? At multa sunt in ijs excerptis, quæ vix, aut nullo modo defendi possunt: sunt multa absurda, sunt non pauca dissona aliis eorundem Auctorum fragmentis, quæ alibi reperiuntur. Quis hæc neget, quis in controversiam vocet, si ipse Annius sæpe repetit, & profitetur? Aborigines in ijs Umbrorum proles dicuntur: hoc falsum esse clamat scriptor nostræ ætatis eruditissimus, &



Annium suppositionis, ac mendacii insinuat, quia apud Dionysium locus genuini Catonis refertur, ubi Aborigines Gentem Græcam fuisse commemorat. Verum hoc labore, ac criminatione superfedere poterat homo doctissimus; nam Annii in eo ipso loco in commentariis ad marginem hoc vidit, hoc notat, hanc sibi difficultatem solvendam proponit. Usque adeo verum est summos viros contra ipsum obstrepere frequenter, sed nunquam legisse. At hoc ipso deterreri debebat ab ijs edendis: quasi vero paria in aliis scriptoribus non reperiantur. In Antonino, quem edidit Surita, omnesque ut verissimum amplectuntur, nonne legitur, ut notat ipse, Annii, Constantinopolis, Maximianopolis, Constantia, & alia, quæ certe cum titulo, & ætate Antonini Augusti conciliari minime possunt? Omitto alios Latinos scriptores, & *quidquid Græcia mendax audet in historia*. Berofus, & Manetho nonne ab antiquo in vulgus sparsi sunt, nonne a scriptoribus sæpe laudati? Cur idem non faceret Annii? Quia in his sunt multa falsa, respondent Canus, Varre-rius, & Vossius, enumerantque singula scrupulosius. Optime vero: sed huiusmodi erant Berofi, & Manethonis antiqua volumina: multa in ijs erant contra veram historiam, & sacras litteras, ut in meis libris attigi, & notat etiam Cedrenus: immo erant *πλήρη ὀψιδὸς, καὶ πλᾶσματὰ* mendaciis plena, & supposita, ut contendit Georgius Syncellus: Ergo bene est, si ejusmodi sunt hæc Anniana fragmenta. Non mirabitur jam Fabricius fuisse, qui Annium defenderent: obstu-uebunt potius posterii extitisse, qui tam inepte accusarent. Jure igitur Barthius: *nec nos negamus*, aiebat, *interpolatos omnes illos Annii auctores, ruptos, fractos, minime bona fide, aut intelligentia translato; tamen antiquitus ex legitimis, verisque auctoribus excerptos talia argumenta sunt, ut quæ contra afferuntur omnia evanescant*. Ipse præterea fidenter affirmo tum multa in iis reprehendi præter æquum, & justum, tum nonnulla quæ reprehenduntur, ea Annii innocentiam maxime ostendere, ac tueri. Exemplum unum, aut alterum proferam illustre, & maxime celebre. Em: Norisius explodit Catonis excerpta, quia ibi Pisæ conditæ ab Alpheis Pelasgis dicuntur. Verus Cato, inquit, apud Servium, negat sibi compertum, qui Pisas tenuerint. Cato id incompertum ait ante adventum Etruscorum in ea loca; ceterum ibidem bis a Pelopis terra Pisanos expresse derivat, & bis iterum addit Teutanes græcos eam

regionem possedisse: deinde etiam Pisas fuisse Teutas appellatas. An oppidum Peloponnesi Teuthis nomine, ubi est Annis Alpheus, ignoravit Norisius, quamvis referat verba Catonis; Annius scivit, qui Catonem apud Servium Danielis nunquam aspexit? Textus illustrior afferri non poterat, qui tam bene evinceret Annii fragmenta meras esse epitomas veterum Scriptorum a non maleferiato homine decerptas. Aquas Taurinas Urbem Mediterraneam secundum Plinium cum Taurianis Thermis in litore confundit Cluverius, Cellarius, Baronius, alique: Ast Annius eam Urbem Apenentem, seu Apentinam appellatam (Apis enim Taurum significat), & non longe ab Agro Sentinate nostræ Provinciæ sitam fuisse scribit. Ut cetera omittam, & Livius consonat libro X., ut in Etruria Metropoli ostendi, & Martyrologium M. s. nostræ Basilicæ Vatic., quod referunt Bollandistæ prid. Id. Majas, qua die in Apennino (codex habet in Apentino) S. Bonifacii, qui Ferenti nostri Episcopus fuit, mortem memorat, & S. Flavianus ad Aquas Taurinas XI. Kal. Jan. via Clodia, quæ sæpe pro Cassia sumitur, prope Viterbum ad Montem Blasconem sepultus est, atque in antiquissimo Templo adhuc colitur. Quid dicam de Inscriptione, quæ nunc Tuscanelli asservatur: **HIC REQ. CORPVSSCE XPINE VGIN FILIA VRBANI DE CIVITATE TIRI**, quam bene antiqua martyrologia, acta S. Martyris præsertim Fuldensia a Bollandistis relata, & Desiderij Decretum confirmat? Turas, seu Tyrus idem est, ac Mars, seu Marta, ut Etrusci pronunciabant, & lacus Vulfiniensis Martæ a Tyri Vrbe, seu Tyria, ut habent quædam M. ss., etiam num appellatur. An Tuscanenses ab Annio decepti sunt? Sed ad celeberrimam controversiam veniamus inter primos nostræ ætatis Antiquarios. Vejos ad Insulam Farnesianam fuisse cum Fabretto, atque utroque Nardino nunc doctissimi Viri pro certo habent. *Ego id pro verissimo affirmo: omnino compertum habeo: nihil hoc certius est*, ait Holstenius, cujus verbis subscribit Lector Ticinensis. Incredibile est quam heic quidam se magnifice efferant: antiquæ enim tabulæ circa X. lapidem luce clarius eam Urbem describunt. Multæ præterea inscriptiones Vejentium ad Insulam repertæ sunt, & concors est Plinius, qui ad tredecim millia passuum Vejentem Agrum Urbis incepisse confirmat. Conclufum est igitur, ajunt, contra Anniana fragmenta, quæ ad Martenianum, seu Lartenianum bis fere tanto longinquius Ve-



jos statuunt. Ego vero, Judices, argumentis addicam necessariis ne hilum quidem contra nos tot summos viros conclusisse. Jam totam concionem attonitam, atque expectatione suspensam video. Quot motus animorum, quot certamina excitantur! Quid ais Censor ab Ancyra, quid tui Sodales, qui toties in hortis ad Tiberim declamantes Annium nugatorem, atque impostorem vocatis? Vos nugas agitis, vos lectoribus imponitis. Antiquos Vejos cum novis confunditis; vetustissimam illam Urbem a Camillo excisam cum recenti colonia, seu municipio miscetis; priora tempora, loca, & gesta cum posterioribus inepte conjungitis. Postquam enim Vejentes dimidia parte agri multati fuerunt, nova Vrbs condita est, sed non eodem loci, quod factitatum fuisse sapius de Colonia differens observavit Panvinus. Quis enim ignorat *Vejos veteres*, ut appellat Propertius, solo æquatos fuisse? Vejorum *occasum* sub Camillo commemorat Livius: Urbis *excidium* L. Florus: *ἡ πόλις ἡ παλαιὰ* Plutarchus, abiectæ Urbis *ruinas* Val. Maximus. Veij igitur, de quibus loquuntur itinerum chartæ circa X. lapidem, & vetus illud Epigramma C. Julij Gelotis Augusti liberti apud Fabrettum, & descriptio Coloniae ejusdem a Frontino relata, cui consonat Plinius Vejentem Agrum Urbis describens, alia res est, & diversa a Vejentibus, qui intra XX. lapidem a Livio, & ad XVIII. ab Eutropio dicuntur, quibuscum facere videtur etiam Dionysius, quem non a Milliario aureo per lapides, sed a portis per stadia græcorum more dimensum opinor. Hæretis? Habeo argumentum firmissimum, ut alia præteream, & prope Achilleum. Propertius, Lucanus, & Florus, qui Augusteis temporibus scripserunt, Vejos pulvere tectos, ruinis obrutos, & a pastoribus, atque ab armentis occupatos vix annalium fidei extitisse credebant: & tamen tunc Vejens municipium, seu Colonia habitabatur, edebat spectacula, & Augustales, Centumvirosque habebat. Ergo diversa est: de illa, non de hac Cato Annianus loquebatur. Similia de gemina, immo trigemina Faliscorum Vrbe afferre possem contra Cluverium, aliosque, de Crustumenis, atque Alstetinis, Gravisicis, Arniensibus, & Salpinatibus, quorum nostri accusatores quamvis eruditissimi in summa ignorance versantur, & tamen contra nostras antiquitates decretorio stilo, atque extripode pronunciant. Verum sicut fragmentorum præsidio, quæ noster Antiquarius in lucem edidit, non

indigeo, quum probatissimis, indubitatisque monumentis abundem; ita tantum solum oneris mihi sumo, quantum satis est, ut defendam vetustiora, verioraque esse, quam ut a Viterbiensibus supponi potuerint. Quare videtis, Judices, omnia accusationum plena, sed probationum inania. Antonius Augustinus, qui de legibus scribit, incidit in S. C. Turpilianum; reliqui accusatores nihil certi proferunt contra hunc reum, immo potius multa, quæ ipsi maxime favent. Re vera quis illius innocentiam, atque eruditionem non admiretur? Dixit Sedem Urbis Agyllinæ per periphrasim apud Virgilium nostram Urbem significari, ut Itacesiam sedem vocat Bajas Silius Italicus, quis confutavit? An unda sub Canem non adeunda quæ sit satis intellexerunt Lipsienses Critici in Tibullo, unde Tuscas nostras thermas Cajas, non Bajas apud Strabonem etiam legendum contendimus? Num Dempsterus, Borghinius, aut Cluverius ulla in re eum jure reprehenderunt? Prætereo multa, ad quæ omni ope asserenda non me mea voluntas, neque in Annium studium, sed nostrarum Antiquitatum exploratæ rationes, atque argumenta in oculos undique incurrentia impulerunt. Testis sit celeberrimus lacus Vadimonis, qui adhuc integer fere apud nos extat, & Navisî dicitur, respondetque ad amussim omnibus partibus Plinii Junioris descriptionis. Etiam nunc natant Insulæ, ut ego ipse magno cum periculo expertus sum, & non procul inde jacet Amæria nostri agri opidum dirutum, nunc *Amerelle*, in tam ampla planicie, ut ad bella natura facta esse videatur. Scio alios illum ponere ad Montem Rosulum; alios ad Mevaniam in Umbria; alios ad Bassanum in locis angustis, præruptis, atque impeditissimis, quod notat etiam Julius Roscius Hortanus; alios demum ad Hortam prope Tiberim, ubi eadem fere angustiae. Verum vel ex hoc intelligi potest, quanto Annii præsent Cluverii, aliorumque elucubrationibus, ut alias ostendi: nam quod Peutingeriana Tabula, quam opponunt, Amerinum prope Falerios locet, nihil est, quia post Theodosium descripta, pro ijs, non pro superioribus Ro. Reip. temporibus usui esse potest, & quando Amerinum antiquissimum esse concedamus; inveniant ibi adversarii, si possunt, natantes insulas, & quod caput est, inveniant locum, ubi quatuor exercitus simul in aciem educi potuerint, ut legimus apud Livium. Jam vero adestum, Lector Ticinensis: tecum mihi nunc res est, qui Cellarium, aliaque magna nomina



sonas , ac crepas , quasi in hisce certaminibus multitudine , ac clamore vincatur , quum certa rerum notitia , locorum inspectione , atque argumentis inde petitis pugnandum sit : a quo tantum abes , ut Thermae Cajas , & Bullicamen , Lacum Ciminium , & Vadimonem , quæ inter se plurimum distant , ridendum in modum misceas , atque confundas . Audi igitur . Livius scribit Sutrinum agro relicto Q. Fabium ETRURIÆ arva ex Cimino contemplatum milites emisisse ; deinde ad nostram Longulam , ut ipse fateris , pervenisse , atque interea res in Etruria fuisse gestas ad lacum Vadimonis . Similiter Florus ex superioribus Cimini jugis Fabium eundem in SVBJECTOS Etruscos , quasi in Terrigenas de Cœlo tela misisse testatur . Vides uterque historicus quam bene mecum faciat ? Vides quam semper tibi a LATERE sit ETRURIA infesta , quam Ciminius hic saltus in MEDIO sit terribilis ? Vbi nunc Bassanum , & loca Faleriæ prope Tiberim ? Vbi descriptio Vincentii Regiensis , qui & Albertum cum reliquis , & seipsum decepit ? De nostra ETRURIA heic agitur , & de Vadimone Etruriæ Deo ; non de Faliscis , qui a nostris erant diversi , & tunc præterea erant in amicitia Romanorum : de profectioe trans silvam Ciminiam , quam septies repetit Livius , ut omittam Frontinum , & Dionem ; non de locis quæ citra sunt ad Bassanum , aut Hortam : de arvis Cimino SVBJECTIS prope Longulam , quæ ex montis vertice contemplatus fuit Romanus Dux , non de Tiberinis , quæ multis millibus passuum , & magnis montibus interiectis inde neque videri , neque adiri potuissent , nisi si retrogrados Etruscos nostros , & Romanos per horrendam illam silvam tibi fingas , atque opineris nostros a Tiberinis illis accolis ea loca incommoda , atque impervia pretio conduxisse ; ut in solo alieno , atque hostili JVRATOS AD SACRA ETRUSCA EQVITES initiarent , & lege sacrata exercitus cogerent , & toties , ut apud Livium , Polybium , & Florum legimus , cum hostibus dimicarent . Videtis igitur , Judices , quam solida sint , quæ in nostris Antiquitatibus leguntur . Quid facerem igitur ? An his , aliisque monumentis , quæ brevitatis gratia sileo , non cederem ? An Annii innocentiae non opitularer ? An veritatis patrocinium defererem ? Præsertim quum ea , quæ contra afferuntur summam regionum nostrarum ignorantiam , antiquorum foederum inscitiam , & in lingua latina infantiam præferant .

Parcite , Judices , si quid mihi  
videor


videor tribuere arrogantius . De his omnibus ex professo egi non ex tenui informatione de libris hausta , aut de auditu ; sed in ijs locis natus ea sæpe adii , dimensus , & contemplatus sum diligentissime , singula cum veterum scriptorum testimoniis , ac peritissimis hominibus contuli , quæ profecto nec Albertus , nec Cluverius , nec Holstenius ( absit verbo invidia ) præstare potuerunt , qui biduo , ad summum triduo apud nos morati sunt . Quid de aliis dicam , qui nunquam ad nostra loca accesserunt ? Sunt viri docti fateor , sed ἀπαρηγόιστοι ἀπαίροντες ajebat contra Sophistas Aristoteles , quod multis experimentis comprobatur ipse Holstenius in Cluverium . Provoco igitur iterum unumquemque accusatorum , ut ad ea respondeat , si vir est ; tot tantorumque maledictorum , quæ in Annium , & Viterbienses conjecit , præstet fidem , si potest . Quod si nostrorum monumentorum veritas , atque antiquitas major est , quam ut a nobis fingi potuerit ; si aliunde nostræ Patriæ decus vetustissimum assertum habemus ; si Desiderii Decretum multo ante Annium descriptum reperitur , & majora in dies ex Musivo , Volturrenis Annii Veri sigillis , innumerisque monumentis Etruscis , & Latinis argumenta suppeditantur , quæ ipse non vidit , unde omnes adversariorum conatus ita ad irritum cadunt , ut prodigium dici posset si ab Annio aliquid tam apte confictum fuisset ; oro vos , Iudices , atque obtestor , ut hominem hunc clarissimum , cujus cum eruditionem Vossius , alique accusatores commendant , tum fidem ipsa saxa quotidie , aliaqua erumpentia e tenebris oblivionis argumenta loquuntur , auctoritate vestra innocentem pronuncietis . Compescite hanc nimiam ingeniorum libertatem , quæ quum in hac litteraria Rep. se primas tenere , atque omnia scire arbitrentur , judiciorum potestatem summa cum injuria vestræ auctoritatis sibi vindicant , quodque deterius est , indicta causa , nullisque expensis rationum momentis pro libito , vel ex invidorum rumoribus doctissimos homines , atque innocentissimos sapissime condemnant . Hoc si feceritis , intelligent omnes in privatis scriptis , ac concionibus esse invidiæ , ac temeritati locum ; in totius literariæ Reip. Senatu , ac judicio solum Innocentiam , & Veritatem plurimum posse , & qui sint impostores , & mendaces æqua lance discerni , ac judicari .



24  
I M P R I M A T U R,

Si videbitur Reverendissimo Patri Magistro Sac. Pal. Apost.

*N. Episc. Bojan. Vicesg.*



I M P R I M A T U R,

Fr. Jo: Benedictus Zuanelli Sac. Palatii  
Apost. Magist. Ord. Prædic.

---

ROMÆ, MDCCXXXII.

---

Typis Johannis Zempel prope Montem Jordanum.  
SUPERIORUM PERMISSU.





